

25. april 2014

UPA 2014/69
Jens Immanuelson

Ulloq 1. januar 2015 inuit Anik isertitallit sulinermut ilanngaammik pisaleqqullugit Naalakkersuisut akileraartarnermut inatsimmik allangortitsinissaq aningaasalersuinissarlu pillugit nassuiaammik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat Inatsisartut 2014mi ukiakkut ataatsimiilerpata saqqummiuteqquneqarpoq, sulinermut ilangaammik eqqussinerup aningaasatigut kingunissai 2015mut Aningaasanut Inatsit pillugu aalajangiinissamut atatillugu pingaarnersiuisoqalerpat ilanngunneqarsinnaaqqullugit.

(Inatsisartunut ilaasortaq Andreas Uldum, Demokraatit)

Siunnersuummut Siumumiit imatut oqaaseqassaagut.

Sulineq qaqugukkulluuniit imminut akilersinnaasussaavoq aamma suliffeqarnikkut naleqassuseq pilersueqataaneq imminullu tatigineq annertuumik ikorfartorneqartartoq tamatta nalunngilarput taamaattumillu suliffisatigut periarfissat aqqutissiuunneqartuartaqartut Siumumi isumaqarpugut.

Ukiut nalaassimavagut assigiinngitsutigut allangortitsiartuaarfiusut aammalu annertuunik unammiligassaqarfiusut taamaatumik siunnersuuteqartoq Siumumiit isumaqatigaarput sulineq akilersinnaasariaqartoq aammalu sulilersitsinissamut aqqutissiuusiuartoqartariaqartoq, tamannalu aamma akileraartarnikkut allannguinermik malitseqassappat Siunnersuuteqartup saqqummiussai misissugassaapput aqqissuseqqinnermi qulaajaaffigineqartariaqartut, taamaattumillu akileraartarnermik inatsimmik allangortitsinissaq aningaasalersuinissarlu pillugit Naalakkersuisut nassuiaammik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut taperserparput.

Siumumi maluginiarparput sulineq imminut akilersinnaassappat ikiorsiissutitut tunniunneqartartut akileraartarnerlu ataqatigiisillugit nutarteriffigisariaqarmata Naalakkerusisut suliniummik ingerlatsinerat tamaalilluni pitsaaqutissat ajoqutaasinnaasullu qulaajaaffigiumallugit ingerlanneqarlutik.

Qulaajaanerit naatsorsuutigineqartutut ukiakkut ataatsimiinnermi naammassineqarnissaat sulissutigineqarmat iluarisimaarlugu nassuiaammik suliaqartoqareerpat nalilersueqataannissarput qilanaaralugu.

Siumumiit taamatut oqaaseqarluta siunnersuuteqartoq Inatsisartunut ilaasortaq Andreas Uldum, Demokraatit siunnersuuteqarnerani Siumumiit taperserparput.